

葉文莊公奏議

葉文莊公兩廣奏草卷七

吏部左侍郎謚文莊崑山葉盛存藁

孫衡州府同知 夢洪較定

六世孫禮部主事 重華彙梓

題爲走報緊急賊情事據委官雷州衛鎮撫顧雲

呈近蒙巡撫都御史葉 牌據署都指揮石錫

呈稱海康縣草賊唐子汪等聚衆流劫拒敵乞

爲多調官軍早來撲捕等因到院督同採珠公

幹都指揮使等官張通等議得此賊若不早爲

設法撫捕撲滅必致貽患地方爲此公同議委

鎮撫顧雲齋榜撫誘合行事宜悉聽顧雲公同
府縣等官從宜處置并行都指揮石鏞雷州衛
所各哨守等官公同顧雲相議設法調度勦滅
又蒙鎮守監丞阮隨密差小旗王鈿前來督捕
并署都指揮僉事石鏞備副總兵歐信帖仰密
切計議務要成功依蒙與海康縣掌印主簿李
振密喚老人黃鍾等議稱若將榜文前去招撫
各賊知是撫誘必致設備拒敵若再遲延調軍
尤恐逃遁山林出沒爲害雲當卽密給賞勞信
帖省令民人李頌李端陰去召募遠近鄉村軍

民總甲民壯人等及令老人黃鍾透與被害軍民招集前來當經李端緝探得唐子淵等弟男見在王宗瑛家寄賣贓牛未回唐子汪等聚集人衆倒牛祭神欲圖出劫本月十七日晚雲躬率原領旗軍張魁等并募到敢勇舍人家人民壯鄧玘等一千餘名各帶軍火器械同主簿李振星夜前去一更時分到于地名烏樹坨取齊雲再三申明號令勸誓同盟令李端等率領總甲民壯分爲右哨張魁等率領軍民舍人分爲左哨俱各潛踪密去賊人巢穴周圍按伏雲自

領旗軍民壯胡深等從中道直馳至五更時分
到彼分布軍兵不期唐子汪等知覺吹鳴大小
銅角燒放神砲火器各執鎗刀藥弩器械擂鼓
吶喊突出迎敵雲奮不顧身躬冒矢石催督所
部軍民齊力向前有左右哨李端張魁等亦皆
起伏四面攻敵各用飛鎗火器對打敵至午牌
時分雲衝入賊陣將首賊一人殺死斬獲首級
餘賊稍退當時李端張魁等併力齊進乘勝追
趕殺傷賊人黃公還等生擒偽號都總管將軍
賊首唐子汪唐子通并偽稱班頭軍頭主案書

吏等項賊黨蕭燕等五十二名當場奪得騎坐馬七匹并被擄男婦陳阿徐等六名口牛一百三十六頭連獲旗鼓銅角器械兇具等件其餘殺敗殘賊俱奔山林收兵回劄十九日五更又督領李端等前去王宗瑛家追捕唐子淵同王宗瑛亦率領弟男王暹等各持鎗棍迎敵被軍兵李端等奮勇齊進就日擒獲賊首唐子淵等二十八名通前共計八十名除賊級認係同徒敢勇當先賊首吳尿管級及將唐子汪等親解雷州衛府審係正身監候其未獲殘賊另行外

被逼脅從之人并被害博界等二十四村驚疑
人民依榜撫諭令其各安生業奪回人口馬牛
召主給領外將生擒并斬首賊人姓名同贓仗
器械及奪得人口男婦牛馬等項數目備開呈
報到院會同鎮總查得先節據守備石鏞把總
馬政等呈各據雷州府備海寧縣申報本縣第
七都積年警跡賊首唐子淵同弟唐子汪等招
集異縣逋逃及有名強賊蕭燕等四十餘家立
作一十六村居住自天順二年十月以來專一
恃強聚衆日夜流劫各都村屯軍民張亮等家

財物牛隻及強虜各村男婦回家勒財贖放令
復聚謀置立旗號鎗刀沿處劫害逼挾鄉村招
集人民朋黨數多號爲門夫不聽官差又據雷
州府備海康縣申據唐克恭狀首同戶房弟唐
子汪兄弟等先年爲盜事發問擬擺站充警不
改前非聚集各處逋逃警跡崔尾等二百餘人
強劫鄉村打死軍餘張進強姦軍妻慎阿呂謀
殺被害告人何時旻事發不服提問輒起謀心
設置黃藍等色旗號銅角鎗刀弓弩銃砲議稱
唐子汪爲都總管大元帥子淵等爲將軍先鋒

等項名目分管各村號爲十六營僞立兇徒崔
尾爲掌營巡簡等各節次分部沿村逼挾平人
爲盜虜掠人口取財贖放又與舊賊李鑿王宗
瑛等往來相通流劫鄉村財物牛馬趕往廣西
博白縣交通徭賊發賣本年九月初旬徭賊前
到橫山駐劄十三日子汪等率賊崔尾等一百
餘徒各執旗號器械前去拜見計謀攻打雷州
府城不期官軍固守同賊流劫鄉村賊去方回
只今置立排柵據險操習發放下人稱伊事已
做大官府都知左右不避但有官軍來捕聽我

中營舉號齊心殺退論功封賞又據廣東都布
按三司各呈前因該抄蒙巡按御史白侃案驗
內開前項草賊生發備行火速會議處置等因
在卷已經會議選委雷州衛鎮撫顧雲齋榜撫
誘擒捕去後今據呈報前因臣等會議得積年
首賊唐子汪本以頑民節次爲盜問發充警稔
惡不悛乃敢聚集兇徒大肆劫掠交通徭賊逼
脅平民惡著一方罪該萬死其交通徭賊謀打
城池一節情罪尤重蓋徭賊流劫不過剽掠財
物隨即散去若令此賊交通得計日久患深實

爲地方心腹之害今鎮撫顧雲官軍人等不負
委託密用智謀奮不顧身直搗巢穴不動聲色
元惡就擒逆醜爲之膽寒闔郡爲之稱快勤勞
若此實爲可嘉除再給榜撫安督捕殘賊及將
殺獲首級驗發梟掛其生擒首賊唐子汪等行
發軍前三司副使等官楊宜等會問明白監候
呈詳并行副總兵將有功官軍造冊齎繳外乞
勅該衙門查照計議將首賊唐子汪等就於
本處明正典刑斬首示衆及將鎮撫顧雲等定
奪陞賞激勵將來謹題

天順三年十二月二十五日

題爲昏夜被賊偷劫城池事據委官廉州衛百戶
等官王瑄等呈前事到院會同鎮總查得先據
守備石鏞呈准把總孫旺報據緝事軍人李廣
等緝遇王同知家人說稱本年十一月十一日
夜四更時分有賊一宗偷劫信宜城池等因已
行委官會勘及行石鏞孫旺督軍追殺去後今
該前因叅照信宜守禦千戶所并原調守備千
戶等官杜瑛王勗等守禦一方不行嚴督旗軍
用心隄備致賊昏夜偷劫城池殺虜軍民失去

印信及照把總都指揮孫旺并守備石鑄平日
號令不嚴失於提督致悞事機俱合拿問以警
將來除行兩廣總兵官嚴督各該地方官軍勦
捕前賊并將被劫人民設法撫安賑濟外謹題
天順三年十二月二十五日

題爲殺獲功次事天順三年十二月十七日據守
備王英呈該本年十月二十一日據封川縣申
并緝事旗軍劉受等報有廣西流賊越境分宗
各從德慶州金林等鄉多坡等嶺前至本縣歸
仁文德等鄉羅爛西河等村駐劫殺虜人財等

因係干賊情重務本職親督官軍合會策應指
揮張元并本縣典史甘堡等各項官軍民壯人
等前到報賊處所果遇前賊各執旗號鎗刀藥
弩向前迎敵當卽分布官軍與賊對陣殺獲賊
級二十五顆生擒賊人二名奪回被虜人口賊
械等件餘賊遁回廣西山界去訖除將殺獲賊
級公同甘堡等辯驗明白行發梟示生擒賊人
牢固監候被虜男婦給親完聚賊械鎗刀等件
給與旗軍領用取領附照外備呈到院案查自
天順三年二月以來日期不等節據把總守備

等官尹通等呈報廣西流賊聚衆入境劫掠鄉
村殺虜人財包攻城堡等因屢經通行嚴備截
殺績據各官呈開節次親領官軍民壯與賊對
敵衝入賊陣斬獲賊級間有迹遁粘踪追捕及
設機裝伏生擒賊人并殺獲首級通計一百三
十七名顆各已行發所在府州縣將賊級辯驗
明白發行梟示生擒賊人監候會審奪回被虜
人口審實遞送原籍給親完聚賊械收庫及給
軍領用備呈案候類奏間今又據呈前因會同
鎮總計議得前項官軍民壯節次殺獲賊級并

生擒賊人功次合當通類具奏定奪陞賞除
行副總兵歐信將各起官軍姓名造冊另行齎
進外今將擒殺功次并奪回男婦總數開坐
謹題

天順三年十二月二十五日

題爲蠻賊攻劫城池縣治等事據巡按廣西御史
吳緯呈奉都察院勘合劄付准兵部咨該本部
叅照容縣千戶所并哨守等官何琛等失機悞
事欲將取問如律照例發落如有重情監候奏
請再照左叅將范信不行嚴督該管地方官

軍護守隄備行臣將范信失機悞事情絲具

奏處置等因本部官奏奉

聖旨是欽此欽遵除何琛等查題外具呈到院除欽
遵外叅照左叅將范信該管地方被賊攻破縣
治搶殺人財燒毀文卷顯是本官平日號令不
嚴不行用心殺賊以致失機悞事合當拿問以
警其餘謹題

天順三年十二月二十九日

題爲急缺官員事案查先爲前事爲照廣西田州
府原設流官同知等官俱各員缺卽今反賊呂

趙等俱已擒捕地方稍寧土官知府岑鏞受事之初必得老成端厚廉潔有守流官與之協同管事撫治夷民整辦兵糧方爲妥便又據潯州府申稱本府知府李華天順四年正月二十日丁繼母憂守制去訖已經備咨吏部去後再照思明鎮安二府向各有流官同知等官因遞年做做呂趙地方不寧土官知府黃道官男岑元全等不得管事襲職以致流官亦多員缺今各府寧靖可期揆之經久事體流官萬不可缺乞勅該部查照定奪急爲銓補謹題

天順四年二月二十日

題爲地方事准鎮守少監朱詳手本據協贊御史
吳禎呈開殺獲反賊呂趙等緣繇具題報捷
通行到院案查先爲前事已經具題續奉

勅書又經節行督捕今准前因臣切惟兩廣賊情廣
東以海賊爲甚廣西以猺獞土賊爲甚而近年
廣西猺獞因見土賊爲惡未正典刑互相倣倣
肆無忌憚越過廣東糾合山猺爲惡海賊則無
如嚴啓盛土賊則無如呂趙皆是積年首賊極
惡窮徒幸賴天威遠被自前年殺獲嚴啓盛

以來四遠商民通番小人皆知鑒戒海中強寇
幾至絕跡今年廣西殺獲呂趙而土官衙門頓
然悚懼猺獍小寇亦皆膽寒軍民人等無不稱
快兩廣之人心已定一方之境土漸寧此雖將
士微勞實皆

皇上 聖德 神武所致但各處賊徒皆因地方官
員或因賄賂或因怠忽養成禍患日漸日深節
觀 欽降禁約交通外夷貿易番貨并禁接受
土官及猺獍人等錢物

聖旨榜文誠爲 明見萬里大哉

皇言遠徼邊人不勝慶幸臣竊聞法立貴乎能守居
安不可忘危寇攘雖曰祛除豈敢因而忘忽况
瘡痍之民十分艱難未得甦息謫詐賊情朝暮
難保當嚴防範除再通行申明欽遵節次

聖旨榜文并將呂趙罪惡備榜曉諭各土官衙門各
山獠徃夷民及軍衛有司等官愈加遵守

朝廷法度改過革非慎固封守以圖共享太平之福
謹題

天順四年二月二十日

題爲軍務事據廣東都司等衙門官胡英等呈到

院案查先准都察院咨准兵部咨該 內府抄

出少監朱詳等題據廣東都司呈委都指揮高
啓管領天順二年上班官軍二千五百一十二
員名前來廣西聽調會同總兵官武進伯朱瑛
等查點得廣州左右前衛并惠州五衛原征官
軍減去四百一十六員名內將邊海潮州衛海
豐所官軍補數中間多係老疾軟弱不堪調用
數內逃故三十六名又比原調欠少七名其海
豐千戶所官軍五十一員名日久不到責據都
指揮高啓回稱今班官軍原係都指揮馬震領

征臨期改委及查原征指揮千百戶席珍等一十九員俱係久征知識地里官員今俱更換蓋是廣東都司當該官吏徐寧尹通等故將領征都指揮紊亂差調及馬震畏懼廣西地方繁難緊要營求本境守備要將馬震等提問等因該兵部叅照所奏都指揮馬震等前項畏避征進及紊亂差調等情律合究問但邊報賊情緊急干礙提問軍職恐妨備邊重務未經查勘明白難便准擬定奪合無行移都御史葉公同兩廣巡按御史將朱詳等奏內事情從公逐一查勘

要見都指揮馬震是否畏懼廣西備邊艱難營
求本境守備其都指揮高啓應否代替馬震領
軍上班并原征官軍指揮席珍等爲因何事存
留應否將潮州衛海豐所官軍撥補中間名數
比之原額有無齊足及是否老弱疾小不堪調
用并都司徐寧等有無紊亂作弊情繇及勘前
項輪班官軍并領軍官員逐一處置明白勘議
停當將應否拿問有罪之人緣繇徑自具實通
勘回 奏定奪奉

聖旨是欽此移咨欽遵行據廣東都司呈勘得所奏

前項廣州左右前後德州五衛減調官軍卷內
先蒙副總兵翁信等會案照得先據肇慶府并
德慶州及新興所縣屢報廣西流賊越境劫掠
鄉村殺虜人財聲言攻城賊情緊急會官議調
廣州左等四衛并惠州守城及廣西替班回還
官軍前去截殺該據新興瀧水二縣申該哨守
官軍數少不敷調用已將調來廣州左右前後
惠州五衛廣西回還指揮等官席珍等摘撥在
於二處添同哨守外今照班期在邇會同左少
監阮能巡按御史呂益計議得廣州左等衛所

官軍調出各處守邊哨守數多見在數少無軍撥補查得潮州衛海豐千戶所見在官軍數多合行該衛所調替會案仰都司差人前去潮州程鄉碣石海豐衛所將原選定操候指揮韓泓等官軍四百九員名前去廣西替班哨守地方俟賊情寧息之日另行定奪及稱原征廣西都指揮馬震蒙副總兵翁信等會案爲地方事議委本官前去肇慶府地方把總守備去訖後本司照該缺官領征呈蒙副總兵翁信等會委都指揮高啓管領廣州左等衛所該班官軍操候

依期前去廣西替班續該鎮守廣西總兵官朱
瑛劄付開催該班官軍令都指揮馬震管領赴
班爲照改委都指揮高啓更替節有通行回報
又該劄付開催海豐千戶所官軍百戶羅英等
五十一名不到批差舍人許智前去催處該所
申稱除拘到官徑送軍前本司仍差舍人許智
等直抵廣西軍前查准都指揮高啓咨報俱已
收發雙競堡哨守再照前項改調存畱領軍官
員俱係副總兵翁信等會案調換不係都指揮
徐寧尹通紊亂作弊等因具結呈繳前來已經

公同巡按御史吳綽叅看得雖稱前因緣未見
看稱兌調潮州等處官軍是否老弱疾小不堪
調用有無相應等項緣絲難以回奏已經駁行
去後今據前因公同巡按御史白侃議得廣東
例該前去廣西輪班官軍年來因流賊侵擾肇
慶等處地方故廣東副總兵翁信等會同鎮巡
等官將都指揮馬震守備肇慶續委都指揮高
啓領軍替班并將指揮等官席珍等改調存留
新興等有賊地方哨守因將潮州等衛所軍多
無賊去處議調撥補頗爲允當其廣西鎮守等

官因見不係常年原守官軍恐是都指揮馬震
畏避并都司徐寧尹通等紊亂作弊因而叅奏
今旣勘稱馬震高啓席珍等俱有總兵等官會
案明文改調撥補及該班官軍並無欠少其潮
州官軍亦俱精壯堪調別無定奪乞 勅該部
計議行令兩廣總兵等官知會今後廣東該班
替換之時務須查照賊情寧息去處衛所仍令
原守官軍前往廣西替換不許仍借今次改調
爲例因而推託如果賊情未寧其廣東輪班官
軍在廣西將官亦不得仍拘原守若中間果有

欠少數目及老弱幼小不堪之數許令指實叅
奏如此庶使事體各得其宜地方兩無所誤謹
題

天順四年二月二十六日

葉文莊公兩廣奏草卷七

葉文莊公兩廣奏草卷八

吏部左侍郎謚文莊崑出葉盛存葉

孫衡州府同知 夢淇較定

六世孫禮部主事 重華彙梓

題爲截殺蠻寇事天順四年三月二十六日臣在
南雄府公幹據分巡副使田崇呈該准叅將孫
麒手本等因照得近又據廣西都司各呈并廣
東都指揮安福等呈俱開天順三年十二月并
天順四年正月二月不等於各處賊行要路趕
截殺獲賊級并器械牛馬及奪回被擄人口等

因到院案查先據廣東守備王英等各呈報截
殺流賊功次已經具題外續又節據各處報
到賊情節次會同兩廣總鎮等官嚴督各該叅
將等官用心追截殺獲解報去後今據前因叅
照前項截殺賊徒正係或行出劫或係劫回爲
惡兇徒俱係各官軍捨死忘生交鋒對敵殺獲
功次旣無冤濫疑誤之弊又有震驚警伏之威
不比別項搜山功次合當褒異以勵後功除人
口器械牛馬頭級各呈內俱已備開處置發落
緣繇別無定奪所據各官軍節次截殺有功例

該陞賞也。勅該部查照定奪。庶得人心知勸。士氣激昂。區區蠻賊不足平矣。謹題。

天順四年三月二十六日

題爲均平徭役事。案照先據廣東布政司呈查得所屬造到均徭文冊中間事無定規。兼多弊病。如潮州府潮陽縣自有廣盈庫。庫子本等齊膳夫外又立聽用名目。高州府電白縣歲辦稅鈔。不過值百餘錠。而僉巡欄一百七十六名較之別邑十分冗濫。衛所首領官有奉上司明文僉撥皂隸。又有全不僉者。遞運防夫儒學庫子廩

一處濫設五十餘名有全無一名者有皂隸止
寫別府僉用其數目處所無憑稽考者有斗級
止寫隨糧量撥不定數額例者又如南雄韶州
等府人少役多預編五年俱係見丁着役代替
消耗十分艱難其編役之時通同里書作弊田
糧丁口止憑先年黃冊多有不實者有將大戶
隱下丁糧充編府縣皂隸貼戶至三四名者有
馬夫朋僉至三十戶者有將貧難人戶當差賤
實人戶作餘剩者又有巧立櫃子榜夫等項名
色者其不均難以悉舉及照各屬巡司弓兵鋪

舍司兵舊例附近編充消乏告替後因一年一
換或係寫遠生疎之人以致有悞遞送巡捕未
便呈乞照詳等因得此爲照所呈作弊官吏人
等犯在革前俱合改正又准廣西布政司咨呈
照得節該戶部奏准通行均徭事例在卷今
訪得各屬府州縣徭役弊病有因無當役凡歇
役年分混擾拘役人難遵守民受其害者有馬
頭積年不換因而出入衙門移貧改富及挾制
浸潤者有官員皂隸因無坐定州縣鄉都名數
泛濫多僉者亦有皂隸巡欄不定相應人戶應

當却科里甲轉科小民以一科十者有舖兵防
夫等項僉點不一及又巧立名色役占小民者
有州縣官吏通同里書殷戶放富差貧者又以
戶役等錢爲名將貧難小戶排門逼要錢物者
蓋難悉舉等因得此爲照均徭一事實養民致
治之良法最便貧難小民但此法一行則事
定規其官吏里書富實頑戶無繇作弊以此奉
行者少今廣西地方未寧若不均平徭役誠恐
富者強而愈欲吞貧貧者怨而轉相爲盜固非
地方之美事亦豈富者之善謀已經公同兩廣

巡按御史布按三司查照本處舊行叅酌均徭
事例并欽奉勅書內從宜處置事理將各項
徭役查理明白處置停當并擬立當役歇役年
分大約如人戶極多州縣十年黃冊每戶當役
一年歇役九年人戶極少差役數多州縣十年
黃冊每戶當役一年歇役一年內弓兵鋪兵等
役仍照舊例俱令附近殷實之家應當各量地
方人數多少或令三年五年之內告替其皂隸
防夫弓兵禁子巡欄齋膳馬夫等項雜役俱令
一年一換每年布政司選各府的當府官一員

管督照依上年事例編役大率各量差役輕重
定立等第丁糧數多殷實之家應當重役下糧
數少以次之家應當輕役其貧難小戶務爲優
恤不與差役編定之日各寫戶役姓名備榜張
掛知會其應役榜仍存卷備照如有放富差貧
那移作弊事發吊榜查照處治庶貧者得以甦
息富者雖勞不怨生民皆可被福詞訟無繇而
興蓋兩廣年來有司多將均徭事例奉行不至
以致富者夤緣在閑貧者困苦應役小民十分
艱難蓋均徭良法不利於貪官污吏不利於富

豪奸里惟利於貧難小民然 朝廷仁政正欲
保養貧民不令失所俾至殷實盜賊自息地方
可寧今兩廣均平徭役一事廣東已行二年廣
西已行一年凡公廉正大官員良善貧難人民
無不稱便謹題

天順四年三月二十六日

題爲措置邊儲事查得廣西布政司開報天順三
年歲終糧數柳州府大軍倉實在糧七萬有餘
慶遠府糧二萬有餘緣各府皆賊徒出沒不常
用兵之處本年又因亢旱災傷而在倉糧米數

亦不多照得各府先年該巡撫侍郎李棠具
奏開中鹽糧得以接濟卽今亦合設法措置庶
免有悞軍糈乞 勅該部計議查照斟酌定奪
將柳慶二府缺糧倉分開中鹽糧召商納米庶
得邊儲有積軍餉不悞謹題

天順四年四月十二日

題爲邊務等事案照近據廣東廣西都司各呈開
該兵部等衙門查照議擬奏奉 欽依內事理
將石亨親戚指揮石寧等註調前來兩廣衛所
差操等因又查得先據廣東海南衛呈稱廣東

都司田積管屯科斂等情已經行仰廣東按察
司勘問果有干碍田積徑自具奏掣問外緣
臣訪得署都指揮僉事田積亦與石亨關親不
敢不言伏乞 聖裁 勅該衙門計議合無將
本宮查照處置謹題

天順四年四月十二日

題爲巡撫等事天順二年四月二十日欽奉

勅諭令臣巡撫兩廣除欽遵外續該戶部奏准行
臣每年照例赴京議事爲此今將兩廣地方軍
民利病合當興革事件開坐具題

一件撫安逃民事廣東南雄韶州潮惠等府地方寬濶去處有福建江西等處流民動以萬計多因艱難逃來依附富家田主容留住種

州縣里老中有貪利之徒每以趕逐及取討供狀爲繇科歛百端亦多有住久家富遂與田主讐殺貽患地方查得韶州府英德一縣報出願候造冊照例附籍并寄住者共一千七百餘戶五千九百餘丁口其他府縣可知切廣東地惡人頑且此逋逃之民先年必係爲惡貽患地方者今既積聚數多若不早爲

設法區處日久月深既無歸着又加科害恐
生他變卽今攢造黃冊亦一處置機會查覈
東地方廣闊額設官員數少必須得人專理
方得事受人安前件乞 勅該衙門會議合
無照依河南撫管流民事例添設廉公有爲
端厚鎮靜布按二司堂上官二員實 勅撫
安禁約科害就便親詣地方審查願附籍者
照依 詔書事例附籍原籍有人情願往來
住種當差者亦要處置稽考免致科害激變
其內若有違碍之人事發另行定奪庶得流

徙無虞地方有益

一件築城久計事看得廣東接連廣西隣界地方地勢險惡民夷頑獷如肇慶府開建封川四會新興等縣地方俱係流賊出沒之所亦有先年招下獍人糾合本處徭人爲賊因無城堡節被攻入縣治其開建縣自景泰至今已經攻破二次劫殺官民荼毒特甚其餘有城堡去處如瀧水縣雖累被賊首鳳弟吉攻打緣新城堅固不致疎虞以此觀之利害可見但查無城去處數多工程浩大民力艱難

前件乞 勅該衙門會議合無選委廣東都
布按三司堂上廉幹官員親詣合當包城地
方嚴督軍衛有司聽其便宜設處人工物料
或乘農隙起倩軍民夫匠併工脩築酌量緩
急每年完一二處其委官不許營指別項差
占因循推調致妨成功近城軍民占住房屋
有碍修築者即便搬拆城內地土有豪強官
員軍民強占朦朧收籍造房養魚者官爲開
填給與軍民居住庶爲勞出一時利存經久
一件番船擾民事查得正統年間事例該戶部

會議今後海外各國使臣進貢如故將朽損舊船駕使前來意在換修新船以蓄利益者聽令自行修理如原船板木新鮮堅壯委被風浪損壞令番使自備物料於附近衛府量撥夫匠修理後又該侍郎揭稽等奏今後各國使臣頭目不許多帶人口及買違禁物件船隻損壞令自修理等因旣不絕其効誠之心亦已破其貪饕之計行之年久國體軍民俱爲便利近年以來各國番使又復朦朧奏告船隻損壞要令修造費用不貲且此輩

得計頻繁而來交結通搭客商販賣違禁貨物耗損中國糜費錢糧有損無益况今廣東蠻賊出沒軍民艱難前件乞 勅該衙門會議行移該部着落布政司知會今後番使朦朧奏 請換修船隻以苟利己擾害軍民者令其自行修理果有損壞止撥夫匠令其自備物料悉照正統年間事例施行庶得好黠革心邊方被福

一件土官害人事照得兩廣邇年有舉保撫徭撫黎除授州縣并巡簡司等衙門官員名爲

土官查此俱軍民等籍正與陰陽醫學官員
相同既非蠻夷種類又非世襲官職多是營
求舉保始則招撫買求以啗官職終乃貪財
激變以壞地方景泰年間因見奏是土官名
色疑爲世襲衙門遂有以夷治夷之議奏定
事例初犯贓罪納米復職再犯監候奏請
發落以致幸而脫罪恣肆貪饕地方壞事前
件乞勅該衙門會議合無除蠻夷世襲土
官衙門州府縣長官司所管土人士民除官
及原係徭徭夷人外但係有司軍民等籍保

除爲土官名色者有犯贓罪依律照例發落
庶得好貪知警良善獲安

一件鹽法便利事照得舊例行鹽地方廣東鹽
課司東北止於梅嶺南雄府西止肇慶府其
附近梅嶺以北江西南安等府地方例該兩
淮運司行鹽又有廣西梧州府以西地方例
該海北鹽課司行鹽緣廣東鹽課司止於本
境行鹽而客商中到引鹽堆積數多難以發
賣動經歲月虧費財本因此不顧身家故違
禁例夤夜馱載北過南雄梅嶺西過梧州發

賣加倍取利其應捕人員如近日事發奸貪
暴橫軍民丘瑜李達等每鹽一引索銀四分
公然賣放越過南安地方除已拿問訖及照
江西南贛二府相去兩淮窻遠廣西梧州等
府又因海北鹽課司地方不寧鹽商少到軍
民仰給廣東故商民膏利不顧法度今若聽
其越境則有碍鹽法而利獨歸於商人若禁
其越境則久滯鹽商而利又歸於奸捕查照
廣東所屬地方多事邊倉急缺糧餉前件乞
勅該衙門會議合無不爲常例暫行廣東

布政司令見在支鹽客商人等今後支出官
鹽有願裝往江西南安贛州并廣西梧州等
府地方發賣者先將鹽數備開狀赴布政司
報名每鹽一引定于沿河缺糧倉分納米若
干取獲實收至日布政司給與印信文憑付
照聽其過境發賣候地方稍寧邊倉糧足各
照舊例地方遵守或公同選委司府廉幹官
員就于南雄梧州專一管理庶得商民兩便
利歸于官

一件急缺邊儲事據廣東布政司呈照得所屬

肇高雷廉等府并廣州府連山等縣地方隣
近廣西流賊爲患各該衛所官軍俱各調邊
哨守妻子在營者旣支本等俸糧官軍在外
者又支行糧四斗邇因地方連年不寧人牛
消耗耕種失業錢糧難徵軍餉浩繁所在邊
儲俱各急缺腹裏倉分亦無積蓄查得各屬
每年秋糧共該九十八萬零內除折銀米四
十五萬石解部外止存本色米五十六萬零
每年官軍并官吏人等俸糧歲用米七十八
萬零歲徵不勾歲用其屯種子粒承佃軍旗

亦多調出操守逾年子粒未完等因係干急
缺邊儲軍餉前件乞 勅該衙門會議合無
暫將下年實徵前項秋糧折銀解部四十五
萬石數內量存二十萬石行移布政司徵收
本色均派邊倉缺糧去處收用接濟候寧靖
糧足之日照舊折銀起解庶得邊儲有備緊
急無虞

一件裁革冗官事據廣西潯州府申本府三縣
共計八十五里人民稀少原設知府同知通
判推官四員經歷知事二員照磨簡較二員

司獄一員官多事少乞照例裁革通判知事
簡較三員省免各官名下馬夫皂隸爲民便
益等因緣廣西人民稀少原設官員數多合
當裁革前件乞 勅該衙門會議合無行令
廣西巡按三司等官查照如潯州府等衙門
果係人多事少官員數多妨民應役去處從
實具 奏定奪裁革冗官送部定奪庶貧民
得所設官有用

一件歸併學較事據廣西平樂府申本府四縣
共該一十五里通計二千餘戶各屬俱有額

設名役但人民稀少名役數多致令一戶充當數役卽今府學廩增生員止有三十五名附郭平樂縣學僅有二十一名外縣生員俱不及數乞照江西南安府裁減歸併事例將平樂縣學生員歸併府學等因緣廣西州縣人少役多學較生員不及額數所有除授教官俱給齋夫等項實爲曠職勞民其潯州慶遠亦有合當歸併去處前件乞 勅該衙門會議合無行令廣西巡按三司等官將各屬學校如平樂府縣等處從實勘議果有人民

稀少生員缺多合當歸併去處
具奏
定奪庶得官無曠員人無勞擾

一件荒田糧米事據廣西梧州府申照得本府
所屬一州九縣如蒼梧縣秋糧該一萬七千
有奇自洪武永樂宣德年間被大藤峽龍山
各處徭賊流劫鄉村殺死人民并逃絕人戶
鍾歪兒等八百一十四戶遺下無徵秋糧三
千餘石每年俱係見在人戶賠納其田地荒
蕪五七十年有生合抱樹木者有山水衝決
欠成空坎者節次奏奉戶部勘合徵糧如額

節將荒田撥與逃戶招撫復業然一聞撥田
俱思逃走以致逐年賠納貧者子女賣盡乞
將前項州縣無徵秋糧從實開豁等因查前
項荒田負糧累民前件乞 勅該衙門會議
合無行移廣西巡按并布政二司選委堂上
官員公同該道按察司官嚴督有司親自沿
丘履畝從實踏勘果有積年逃絕拋荒是實
量與開豁以蘇民困其有堪佃田畝准令折
徵銀兩兼支俸給庶得錢糧易辦困苦得甦
一件食鹽鈔貫事據廣東廣州等府新會等縣

申近奉勘合鹽鈔鄉民納米市民納鈔查得
本處細民薄田三十畝該糧一石而家有七
口者該納鹽鈔米一石軍戶不得拆戶十口
二十口者有之又全無田糧納至二石者
有之似此納米實是艱難乞照舊例納鈔爲
便等因勘得前項鹽鈔今改納米大爲不便
況兼軍衛有司俸給鈔貫比因收積鈔少連
年不給前件乞勅該衙門會議將前項戶
口食鹽鈔貫照依舊例不分鄉市一體納鈔
庶得鈔勾支給人無嗟怨

一件精選官軍事照得各邊官軍俱有隊伍以
上等精銳者爲頭撥聽調殺賊次等爲次撥
守城公差等項差用以此官軍有制人人得
用兩廣先年官軍隊伍不亂近年有官員名
下役占買閑輸納月錢者有衛所隱蔽數目
不清者有賄營差使經久不役者有投充圍
子手名色專一跟官都司以下不敢差用領
調者甚至有才堪管領隊伍精銳官員因見
地方不寧往往投托跟官不出者雖是先年
殺手隊伍專靠殺賊精兵亦有容倩營求差

使致使強弱不分隊伍星散以致調遣不無
合轉爾我不相識彼此不相顧軍威不振賊
無忌憚雖經整理未得歸一前件乞 勅該
衙門會議合無照依申明軍政官員事例行
令巡按等官并推選廉公有爲曉暢軍事按
察司等官路遠衛所分投前去各要公同內
外官員將衛所各隊伍官軍照依食糧案卷
逐一清查點選上等者編爲頭撥次等者編
爲次撥置牌填寫專備查點調發仍要造冊
回 奏一面送總兵叅將及鎮巡等官處備

照遇有調發聽憑全隊調撥其頭撥內後有
事故在外許叅將等官就于次撥內選補仍
行總兵等官知會其跟官軍伴併一應輕重
公差止許于衛所守城及餘幼等項內差用
若有隱蔽數目及再將頭撥聽調殺賊官軍
紊亂隊伍賣放差用者治以重罪點選風憲
等官不行用心革弊及大小官員占愆不公
者通行叅究問罪庶得軍政修明地方寧謐
一件達軍殺賊事照得廣西逾年以來蠻賊猖
獗往往越過廣東其廣東高廉肇慶等府亦

有本處徭獍爲惡案查廣西先年有貴州精

兵一萬湖廣精兵一萬又有廣東輪班官軍

聽調今廣東止每班二千五百員名湖廣止

五千員名其貴州俱各不到緣兩廣地大賊

多官軍數少卽今貴州賊已殺敗及訪得達

官達軍熟于弓箭能制蠻賊見在南京等處

食糧在閑前件乞 勅該衙門會議合無于

貴州湖廣等處照舊撥軍赴廣西聽調復于

南京等各處在閑達官達軍內精選一千或

五百員名連家小差官統領管送赴兩廣總

兵等官處交割安插聽調殺賊庶任用得宜
盜賊可滅

天順四年七月二十一日

葉文莊公兩廣奏草卷八

葉文莊公兩廣奏草卷九

吏部左侍郎謚文莊崑山葉盛存藁

孫衡州府同知 夢淇較定

六世孫禮部主事 重華彙梓

題爲緊急賊情事該據瓊州府備瓊山縣縣丞蕭
時春呈天順四年十一月十一日夜三更時分
城內四散火起人聲吶喊打進縣門燒劫公解
卷冊及造成進貢蜜煎檳榔椰子廉州供應採
珠廩給白米牢內囚犯等項吏卒被傷無人救
護本職止帶得本縣印信越過衙後院墻見賊

勢兇大殺傷人命官軍不能抵敵本職趨混脫
走出外賊人閉門在內延燒公廨軍民房屋等
因轉呈到院行間又據永安守禦千戶所呈抄
蒙太監吳昱等案驗據瓊州府申開本日夜有
海南衛不知名軍舍二百餘徒先將本衛指揮
石鑑家劫起當殺人口及取伊家器械鎗甲等
件次劫牢獄放火燒殺聲言府家不要動作與
你無讐天明時候該衛指揮等官軍與賊對敵
不過被賊占坐衛堂發放有本府知府葉萬同
經歷陳樸等思得城內俱係官軍住坐並無百

姓護手賊勢兇惡暫在附郭鄉都起集民壯撫
安百姓等因又據廣東都司呈奉副總兵歐信
劄付該據海南衛無印信呈文亦開本日夜被
賊一宗約五百餘衆攻開城門殺死軍民男婦
不計其數進入本衛指揮石鑑家搶去銅牌印
信軍器燒毀房屋劫放囚犯占奪城池天明認
係本衛後所舍人邵宣并左右等所在逃旗軍
許清戴毛兒等爲是本衛軍餘蒙調大征採珠
等項數多見在數少不能抵敵卽今前賊住劄
在城僞稱總兵名目等因據此照得先該欽奉

勅書事理議調屯守官軍同監丞阮隨親率會合左
叅將范信所統軍兵于永安珠場勦捕賊寇防
護採珠近據守備石鏹等官節報廣西流賊不
下萬數越境分宗攻圍高州化州遂溪神電吳
川等處城池流劫鄉村殺擄人財猖獗尤甚各
率官軍勦殺間今據前因會同議得所報前賊
合于軍前殺賊官軍內摘調五百員名并調海
南衛原調守備隨捕指揮李翊趙鑑等官軍九
百員名共一千四百員名委指揮僉事張豫管
領前去策應勦殺合劄本司卽行總督備倭張

通星飛前往該衛督捕前賊等因各具呈到院
會同巡按御史都布按三司官叅看得府衛情
詞雖有不同俱係地方賊情重務除都按二司
正官止有署布政司事副使鄭彥譽見在合委
本官齋榜并行委韶州公幹叅政龔毅等星馳
前去撫安相機擒捕及又議得珠池與瓊州府
相近其見在彼處採珠叅議朱英在司年久熟
知彼處事情係緊急重務差人星夜齋文前
去令其公同副使鄭彥譽撫捕行事其布政司
珠池事務暫委僉事陳濂公同僉事黃隆管理

去後又據瓊州府呈本月十三日據民壯顏富等報獲得白旗一面書寫投順二字稱蒙本府批仰守把地方有軍賊開南門約十餘人出來招順當與對敵殺得首級一顆認係賊首軍人鄭獻餘賊走回城訖十四日又據廂長許實等報蒙統民壯南門外住劄守護地方本日有賊一十餘人出城與實對敵殺得不知名賊首三顆又據叅議朱英差人齎執雷州府衛官帖報據民壯徐懷等報十一月二十二日緝探有張指揮在彼分授趕船四十二隻祭廟二十五日

過海訪問船甲口稱賊人每月出城搬取柴米
擄掠人口止有五十餘人鎗刀衣甲整齊彼中
無大施爲但以必得石指揮到手便散爲詞有
總兵歐信又差都指揮安福統領官軍一千員
名前去截殺等因各報到院復會同都布按三
司并巡按等官議得各城堡精銳官兵俱先該
總兵等官調在廉州流賊生發地面城池空虛
難再掣調除臣于新會等處添選民壯軍餘躬
親統率兼程前去嚴督勦捕前賊撫安軍民及
體勘的實事機另行馳奏外謹題

天順四年閏十一月二十四日

題爲區畫邊務事據廣東按察司呈照得廣東先
因地方廣濶政務繁多正統年間布政司添叅
政二員一員巡察邊務一員整理糧儲按察司
添設副使一員巡察海道景泰年間爲陳言減
省事例革去前項官員廣東累被廣西蠻賊越
境流劫額設官員分理不周錢糧海道缺官整
理呈乞照詳等因到院行間又據廣東都布二
司亦呈前因會同巡按御史都布按三司等議
得廣東地方廣濶政務浩繁錢糧拖欠倭寇出

沒不可無官專理乞

勅該部計議照舊添除歷練老成有爲有守叅政副使各一員馳驛前來管根巡海謹題

天順四年閏十一月二十四日

題爲謀叛攻城殺擄人財等事案照先據廣東都司等衙門呈該鎮守副總兵歐信等劄付案驗內開天順四年十一月十一日夜有反賊舍人邵瑄并逃軍許清戴毛兒民人周春等占奪城池僞稱名號劫擄人財等因到院會同巡按御史三司等議得除節次行委三司官員撫捕体

勘并近該都指揮等官安福等報到勦平前賊
克復城池捷音另行具 奏外叅照海南衛掌
印指揮僉事石鑑不行設備固守致賊攻陷城
池合當拏問及照在衛指揮千百戶等官俱各
不能防姦禦侮致有誤事今賊雖勦滅亦合查
提問罪以警將來謹題

天順四年十二月二十日

題爲捷音事天順四年十二月十八日據廣東都
司呈奉鎮守副總兵歐信劄付本年閏十一月
二十五日申時據都指揮僉事安福呈先蒙議

委前到海南于本月初二日嚴督官軍與賊對敵殺獲總兵旗牌學士等項首級生擒偽總督張欽等有偽順天王邵瑄大王許清等混陣奔向定安縣路隨調指揮趙鑑等領軍黏踪追勦本職全軍入城駐守撫安軍民俱各復業本月初四日官軍追至葫蘆港賊人搶船出海官軍追逼勢窮力盡棄船登岸初五日追至賓宰驛初六日追至丫髻嶺初七日追至栢榔根初八日追至莫村節次與賊交鋒對敵獲有功次初九等日賊人駐劄水表等村本職嚴督指揮張

豫等官軍連日追殺賊衆退往西黎田凹大小
駐劄本月十六日官軍進逼有賊首邵瑄等仍
領賊衆據險迎敵官軍奮勇齊進奪其險阻衝
入賊陣時有旗軍陳雄等斬獲邵瑄等首從賊
級餘賊潰散隨督官軍民壯土官黎兵人等追
勦本月十八日到地名水尾又行斬獲許清戴
毛兒等首從賊級解報公同衛所府縣等官召
集軍民人等逐一辯驗是實具呈到職會同左
監丞阮隨議行安福解送首級至日差官獻俘
并取勦功次及有功官軍姓名造冊另行備錄

轉呈到院案查先據瓊州府備瓊山縣縣丞蕭時春呈及永安千戶所申抄蒙太監吳昱等案驗并副總兵歐信劄付俱稱本年十一月十一日夜有反賊舍人邵瑄逃軍許清等占奪城池等因已委都指揮等官安福張豫領軍勦殺并行總督備倭張通督捕等因已經會同巡按御史都布按三司計議具題行委副使鄺彥譽叅政龔毅等撫捕及臣于新會等處添選民壯軍餘勦捕前賊本年十二月初三日臣在新會縣本日節據都布按三司呈揭內開本年閏十

一月三十日酉時據廣州府南海縣備典史周文郁里長歐陽宣等呈報本日辰時有廣西流賊不計其數分作三宗流劫附近廣州府胥江三江官窰等處十分猖獗要乞親督都指揮張通等大勢官軍策救危急等因又據定安縣申稱本年十一月二十七日已將反賊邵瑄賊黨鍾璇等殺獲及又據張通稟有都指揮石鈞書報海南軍舍謀叛占奪城池官軍征勦已平臣當就督同都指揮張通等官軍星夜前赴廣州府行據都指揮張通等呈本月初六日各准本

司咨開該臣會案依奉統領官軍民壯同閱視

僉事戈立等就夜行至初七日寅時俱到三江
據緝事旗軍報稱各賊聞知大軍前進預于初
六日三更時分放火燒毀民房逃遁據報隨卽
督軍陸路黏追賊衆驚張從四會大山僻路奔
遁去訖又據胥江等處里老人等稟稱蒙官軍
追逐流賊遁走又蒙安管撫鎮避賊人民俱已
復業墟場買賣亦各如故等因及節據指揮官
盧源等并巡簡老人等節次解報殺獲流賊首
級并生擒流賊及奪回被擄人口男婦前來俱

驗發梟掛收問及給領訖今據前因會同巡按御史三司官等議得海南衛反賊廣州府流賊雖各勦平奔遁緣瘡痍軍民合應撫安流賊姦詐合當嚴備除行兩廣總兵官襲捕并查都司止有帶俸差操張瑀見在令于胥江等處操練隄備殺賊及行原委副使鄺彥譽等加意撫安照依先行體勘各項緣繇并查官軍功次至日另行外謹題

天順四年十二月二十日

題爲請兵殺賊安民事案照節據高廉雷肇等府

呈據化州等州茂名等縣申據里老人民節狀
告報天順四年八月內被廣西大藤峽龍山西
峒等處強賊三四十宗動以萬計分投流劫鄉
村殺傷人命燒毀房屋捉擄人口逼要銀兩家
貧無措者盡將田產典賣贖命無人取贖者俱
被殺死擄去賊勢猖獗人民受苦又據廣州府
南海新會等縣申報本年閏十一月內忽被廣
西強賊流至胥江官窰蓮塘等處殺擄人口燒
毀房屋乞調大軍勦捕等因除另行外會同鎮
總巡按御史都布按等官議得雷廉高肇等府

接連廣西鬱林博白桂平懷賀等州縣所轄地名大藤峽龍山五屯曹村等處徭獍先年彼處守鎮得人兵力強盛此類稍或蠢動卽便痛加勦捕雖是出沒不常終知畏懼官軍後來守鎮者不得其人或務行姑息或貪贖貨利法度廢弛土兵逃叛兵政不修軍威不振如大藤峽一處自總兵官柳溥征後未經征勦以致賊徒日衆賊勢日強且貴州湖廣原守廣西出戰精兵二萬卽今止有五千又將廣東沿江官軍分撥別處致賊侵入廣東地方賊人所過又有地方

無知民徭招來野獍乘機趁亂隨從爲惡蜂屯
蟻聚動至千萬甚而披帶盔甲器械騎坐馬匹
僞稱總兵將軍名號部伍號令往來殺掠今年
乃敢深入南至新會相去省城不過二日北至
官窰相去省城僅止半日猖獗更甚臣等查得
自正統十三年至今前項流賊節次攻陷偷劫
廣東州縣城池排柵已該一十餘處雖經隨行
修復人民荼毒已多臣遵奉

勅旨節次親督官軍于廉雷等處珠池地方往來截
殺防護採珠奈綠軍少賊多不無顧此失彼雖

是節行三廣會兵勦捕而彼此地方多事未克
成功但此賊根源巢穴全在廣西延及東省使
廣西若不勦平廣東終無寧靖又兼前項賊巢
山溪林密兩廣地方延袤千里所在官軍除摘
調守備各處城堡外實在數少縱能會合分布
不敷兼以兩軍同事彼此頡頏不相統一徒費
錢糧難以成事若非大舉全師拔除根本則盜
賊日多百姓日困官軍日疲由地拋荒錢糧缺
納邊儲匱乏戰守難爲抑恐所在殘破釀成大
患上勞 聖慮臣等此時言之晚矣伏乞

皇上俯念地方生民 勅該衙門計議特遣大兵統
調兩京漢蓬官軍再調鄰近湖廣江西原征廣
東反賊官軍各令彼處將官統領前來與同兩
廣官軍公同撫按三司等官查議將廣西大藤
峽五屯等處積年爲惡有名賊巢村分申嚴賞
罰責以成効相機設策痛加勦殺務在搗巢覆
穴噍類無遺庶幾蠻夷知畏地方得寧謹題

天順五年正月十八日

題爲採辦珍珠事據廣東都布按三司委官右叅
議朱英等會呈各據雷州等三府委官知府等

官呈據採珠夫蜚連名狀告天順五年月日不
等各蒙起倩前來白沙珠場起蓋廠房聽候採
珠彼時因被流賊萬餘分宗入境殺擄人財燒
毀房屋攻逼城池驚散夫蜚不能用工後蒙官
軍勦賊稍退方得採木起廠至十二月內開水
採珠延至交春夫蜚瘟病死亡相繼天順四年
三月以後幸蒙罷工放回傳染瘟疫有全家死
者有中途死者不下一二萬人又有中途遇賊
截殺隨來放火烧毀珠廠本年六月內蒙起倩
人夫船蜚前來永安重造珠廠將完九月初十

日又被狂風將珠厰寶亭盡皆吹倒船隻人口盤纏什物盡皆飄流及淹死夫番李三等人衆續蒙着令修造置辦復被流賊于近厰鄉村殺擄人口驚惶不息後至本年十月內蒙

欽差太監等官到厰十一月初一日督令開水採珠間又因流賊劫擄人夫半被驚散且瓊州府反賊邵瑄等攻陷城池該府軍夫俱各驚回遺下船隻負累五府原存看鋪夫番撥去代駕採珠海洋廣濶節被漂流船隻淹死軍夫况兼各人家鄉又被流賊攻圍殺擄久住不退父母妻子

流離失所不能相顧卽今春近瘴發人多生病
十二月以來又加連日大風阻滯船隻切思各
處珠池邇年被盜又經上年採撈已過今歲稀
少名雖珠池實係大海見蒙日逐比較討螺不
得苦楚難當乞轉達憐憫等因行該太監吳昱
等案仰三司委官會同知府等查審得各府地
方人民累被流賊攻劫焚燒畧無寧處雖有官
軍勦殺而賊多軍少顧此失彼況且風潮衝滄
瘟病不息死亡相枕骨肉流離耕種失業飢寒
迫身民情困苦難以盡言非惟貧不聊生抑恐

釀成後惠及查得原情採珠船隻在海遭風飄
壞一百二十五隻漂流并滄死坐船百戶楊聚
等軍民夫番六百九十六員名被賊驚散及陸
續逃躲軍民夫番二千七十一名瘟病纏染死
亡二百三十七名中途被賊殺擄五十五名審
據監船採珠委官指揮河泊等官結稱訪得各
處珠池被賊偷盜又係上年採撈已過今次日
逐揀選送廠珠螺嫩少撈取難得卽日春氣發
動連日刮風漂泊船隻海邊夫番凍餒在船無
螺交官十分苦楚再查永安倉根支過起廠并

採珠軍夫兩廣殺賊官軍士兵行糧口糧共一
萬九百六石其原撥各縣該納秋糧因被前項
災盜連年追納未完等因具呈及查得先又該
據雷州府遂溪縣申天順三年珠夫病故并逃
竄死絕一萬九十八名徐聞縣申珠夫在廠病
故男子四千三百一名海康縣申珠夫在廠死
絕人丁四千八百八十三丁等因會同鎮總巡
按御史都布按三司等官議得廣東地方人民
節被流賊劫殺除另本具題請兵外今照珠
池已經二次採撈未免珠螺稀嫩須暫停緩始

堪採取又必大兵滅賊地方寧靖人力寬甦方
便採辦及照夫蚤王珍等節次申告各詞係干
民情不敢隱蔽伏乞

聖恩憐憫定奪謹題

天順五年正月十八日

題爲獻俘事該據海南衛經歷司呈承准本衛無
印照會奉廣東都司署都指揮僉事安福劄付
將殺獲僞稱天王首賊邵瑄僞大王許清戴毛
兒首級三顆用櫃裝盛生擒僞總督張欽張殷
二名牢固枷鎖委官管解前赴鎮總軍前告交

其餘賊級五百六十六顆驗發梟掛等因續據本衛鎮撫呈稱賊首張欽張殷陸續在監病故相視明白斬首同首賊邵瑄等首級俱用櫃裝盛交付千戶張政管解前來會同鎮總巡按御史都布按三司官案查先據海南衛府等衙門報稱反賊邵瑄等僞稱名號占據城池已經議調官軍委署都指揮僉事等官安福等管領前去撫勦續據本官呈依奉督同指揮張豫等官軍擒殺首賊克復城池節次斬獲首從賊級解報公同衛府所縣指揮知府等官召集軍民逐

一辨驗明白識認數內三顆委係首賊邵瑄等頭級并生擒張欽等差人另解等因已將捷音緣繇會本具題外續又該會官看得張欽等未經會問賊級未經驗發梟掛恐有未的及有首惡共謀脅從之數未經體勘又經通行去後今據前因除官軍功次并體勘首惡共謀脅從緣繇催報至日另行叅照首賊邵瑄張欽等聚衆反叛謀爲不軌一方大患罪惡滔天今旣官軍擒殺斬獲首級見在合當函首解京獻俘爲此開坐會本謹題

天順五年二月初二日

題爲殺獲海賊事據廣東都布按三司呈依奉鎮
守總兵巡撫等官案驗劄付內事理會官將備
倭張通等殺獲到海賊首級辨驗是實發沿海
新會等處梟掛兇具送都司收貯聽候番貨盤
送廣東布政司官庫收貯開呈數目緣繇到院
會同鎮守等官案查近據廣東都司等衙門呈
前事天順四年九月十五日申時據廣海衛指
揮周昊呈該緝事旗軍烽堠民夫鄭寬等走報
本月初六日瞭有三桅大船一隻双桅白船二

隻單桅槽船四隻從濟洲洋行使至境地名上
川山小屯灣拋泊縱使快馬船隻往來在海劫
殺鄉村搶擄新會香山二縣過往民人余顯保
等人口船隻等因據報行准本司咨抄蒙巡按
御史等官會案備行本職會同副使楊宜查照
先年擒捕海賊嚴啟盛事例量調官軍人等相
機勦捕依蒙會調南海等衛所備倭官軍民壯
人等整搦軍火器械坐駕戰槽船隻公同兼程
至閏十一月初八日卯時到于小屯灣果見三
桅大賊船一隻白船六隻幫作一處擺執軍器

豎立旗號燒放銃砲齊聲吶喊來與官軍對敵
通等申嚴號令督勵所部官軍人等與賊交鋒
對敵奪得雙桅快馬賊船大小三隻生擒番賊
七名殺獲賊級四十五顆餘賊渰死難以計數
各賊對敵不過就駕原來三桅單桅大小船四
隻乘風奔使出洋逃遁去訖緣係無邊大洋又
兼風迅不便當卽收軍回船除將擒殺賊級名
顆及獲到賊船并番貨胡椒等物公同貯收差
官起解今將生擒番賊及殺獲功次兇具等項
同有功官軍等姓名備開差百戶郭珍管解乞

爲照驗等因已經會官查議通行去後今據前
因除將見獲番賊送按察司會問明白差人解
京船隻仍發張通等官軍領去使駕追殺未獲
餘賊官軍人等功次另行外謹題

天順五年二月 日

兩廣奏草卷九終